

REGLUGERÐ

um svæðisstjórnir málefna fatlaðra.

I. KAFLI

Stofnun og skipan svæðisstjórna.

1. gr.

Á hverju starfssvæði samkvæmt 5. gr. laga nr. 41/1983 um málefni fatlaðra skal starfa svæðisstjórn.

2. gr.

Í hverri svæðisstjórn eiga sæti: héraðslæknir, fræðslustjóri og fimm menn skipaðir af félagsmálaráðherra, tveir þeirra samkvæmt tilnefningu svæðisbundinna samtaka sveitarfélaga og skal annar þeirra vera úr stjórn eða fulltrúi viðkomandi samtaka og þrír samkvæmt tilnefningu fatlaðra, Landssamtakanna Proskahjálpar og Öryrkjabandalags Íslands.

Í Reykjavík tilnefnir borgarstjórn tvo fulltrúa, annan úr sínum hópi en hinn fulltrúa í félagsmálaráði Reykjavíkur.

Um skipan í svæðisstjórn fer samkvæmt reglugerð nr. 779/1983. Skipunartími svæðisstjórna er fjögur ár.

II. KAFLI.

Hlutverk svæðisstjórna.

Áætlanagerð.

3. gr.

Svæðisstjórnir safna upplýsingum og kanna þörf fyrir þjónustu við fatlaða hver á sínu svæði. Hér er bæði átt við sérstaka þjónustu vegna fatlaðra svo og hvernig veita megi fötludum þjónustu á almennum stofnunum.

Á grundvelli þessara upplýsinga gera svæðisstjórnir tillögur og áætlun um þjónustu fyrir fatlaða hver á sínu svæði.

Svæðisstjórnir skulu samræma tillögur um þjónustu við fatlaða þannig að aðgerðir þeirra aðila, sem með þessi mál fara á svæðinu, séu með þeim hætti að þær tryggji fötludum jafnrétti og sambærileg lífskjör við aðra þjóðfélagsþegna, sbr. 1. gr. laga nr. 41/1983 um málefni fatlaðra.

Svæðisstjórnir senda viðkomandi ráðuneytum tillögur, sbr. 2. og 3. mgr., ásamt framkvæmdaáætlun til 3ja ára. Afrit af áætluninni skal sent stjórnarnefnd.

4. gr.

Svæðisstjórnir skulu gera árlega áætlun og tillögur um forgang verkefna vegna úthlutunar úr Framkvæmdasjóði fatlaðra og senda hlutaðeigandi ráðuneyti eigi síðar en í september ár hvert.

Við forgangsroðun verkefna skal taka mið af fyrri áætlunum.

5. gr.

Svæðisstjórnir gera árlega fjárhags- og framkvæmdaáætlanir til notkunar við undirbúning fjárlaga og skal senda þær til viðkomandi ráðuneytis fyrir 1. apríl ár hvert.

Vistun á stofnanir.**6. gr.**

Umsóknir um þjónustu og vistun á meðferðarheimilum, sambýlum, hjúkrunarheimilum og vistheimilum skulu sendar hlutaðeigandi svæðisstjórn. Svæðisstjórn skal leita sérfræðilegrar aðstoðar og umsagnar Greiningar- og ráðgjafarstöðvar ríkisins eða hjá öðrum greiningar- og ráðgjafaraðila. Að fenginni slíkri sérfræðilegri aðstoð/umsögn skal ákvörðun um vistun tekin með þeim hætti sem hér greinir:

- a) Þegar um stofnanir á vegum opinberra aðila er að ræða, skal svæðisstjórn taka ákvörðun um vistun í samráði við forstöðumann stofnunarinnar. Rísi ágreiningur milli þessara aðila sker stjórnarnefnd um málefni fatlaðra úr um.
- b) Þegar í hlut eiga stofnanir, sem reknar eru af öðrum en opinberum aðilum, getur vistun því aðeins átt sér stað að fyrir liggi samþykki forstöðumanns og/eða stjórnar viðkomandi stofnunar. Sé umsókn um vistun synjað er heimilt að vísa málinu til stjórnarnefndar um málefni fatlaðra sem leitar lausnar.

7. gr.

Sé óskað eftir vistun á stofnun, sbr. 6. gr. reglugerðar þessarar, sem er á öðru svæði en lögheimili umsækjanda, skal umsókn send til svæðisstjórnar á því svæði þar sem stofnunin er. Sú svæðisstjórn skal fjalla um umsóknina og mæli hún með vistun skal hún hafa samráð við svæðisstjórn á því svæði þar sem lögheimili umsækjanda er en taka síðan endanlega ákvörðun.

8. gr.

Ákvæði 6. og 7. gr. skulu eiga við hvort heldur um er að ræða vistun til lengri eða skemmri tíma á þeim stofnunum sem greindar eru í 6. gr. reglugerðar þessarar.

9. gr.

Hafi ekki verið um fyrirfram umsáminn dvalartíma að ræða á stofnunum skv. 6. gr. reglugerðar þessarar, skulu svæðisstjórnir fylgjast með því hvenær dvalartíma lýkur og eiga hlut að máli þegar ákvörðun um brottför er tekin.

Eftirlitsskylda svæðisstjórna með stofnunum fatlaðra.**10. gr.**

Svæðisstjórnir skulu, hver á sínu svæði, annast eftirlit með stofnunum fyrir fatlaða, öðrum en þeim sem svæðisstjórn er beinn rekstraraðili að, þ. e. a. s. sjálfseignarstofnunum, stofnunum félaga fatlaðra og stofnunum sveitarfélaga. Eftirlitið nær til allrar starfsemi slíkra stofnana, s. s. stjórnunar, fjármála og faglegs starfs. Stjórnendum stofnana er skylt að veita svæðisstjórn og/eða fulltrúa hennar aðgang að öllum upplýsingum sem kann að vera óskað eftir í þessu skyni. Svæðisstjórn getur óskað eftir að sitja fundi innan stofnunarinnar og er stjórnendum skylt að veita svæðisstjórn aðgang að þeim.

11. gr.

Svæðisstjórnir geta hvenær sem er óskað eftir upplýsingum er snerta fjármál stofnana, sbr. 10. gr., hvort heldur um er að ræða rekstur eða stofnkostnað. Svæðisstjórn er heimilt að fá yfirlit yfir launagreiðslur til fatlaðra af hálfu stofnunarinnar. Einnig getur svæðisstjórn krafist stofnanir um yfirlit vegna þeirra tekna sem einstaklingar leggja til reksturs stofnunarinnar.

12. gr.

Faglegt eftirlit, sbr. 10. gr., felst í því að svæðisstjórnnum er hvenær sem er heimilt að óska eftir upplýsingum um stjórnun, starfsmannahald svo og um það hvers konar þjónusta, alhliða eða einstaklingsbundin, sé veitt á viðkomandi stofnun. Stjórnendum stofnunarinnar ber að láta slíkar upplýsingar í té.

13. gr.

Komi í ljós, að mati svæðisstjórnar, að einhverju sé ábótavant í starfsemi stofnunar, sbr. 10.—12. gr. reglugerðar þessarar, ber svæðisstjórn að leiðabefna stofnunum um það sem betur má fara og fylgja eftir þeim breytingum sem hún telur nauðsynlegar. Þegar einstaklingsbundin meðferð og velferð hins fatlaða á stofnuninni á í hlut, er svæðisstjórn heimilt að óska eftir því að Greiningar- og ráðgjafarstöð ríkisins veiti faglegar ráðleggingar, sbr. 8. tl. 16. gr. laga nr. 41/1983 um málefni fatlaðra. Einnig skal svæðisstjórn beita sér fyrir breytingum í samræmi við þær ráðleggingar/ráðgjöf sem Greiningar- og ráðgjafarstöðin hefur mælt með.

Fari stofnunin ekki eftir þeim kröfum til úrbóta, sem svæðisstjórnin hefur sett fram, innan hæfilegs tíma, sendir svæðisstjórn málið til stjórnarnefndar um málefni fatlaðra.

Umsagnir vegna starfsleyfa stofnana.

14. gr.

Svæðisstjórnir veita umsagnir vegna beiðna um starfsleyfi, sbr. 11. gr. laga um málefni fatlaðra nr. 41/1983, til hlutaðeigandi ráðuneyta þegar félög fatlaðra eða sveitarfélög óska eftir að setja á fót og starfrækja stofnanir fyrir fatlaða skv. 7. gr. laga um málefni fatlaðra.

Húsnæðismál.

15. gr.

Svæðisstjórnir skulu fjalla um úrbætur í húsnæðismálum fatlaðra, bæði hvað varðar stofnanir og einstaklinga og gera ákveðnar tillögur í þeim efnum til Húsnæðisstofnunar ríkisins.

16. gr.

Svæðisstjórnir skulu kynna sér rétt hinna fötluðu til lána úr Byggingarsjóði ríkisins samkvæmt reglugerð nr. 321/1986 um Byggingarsjóð ríkisins samkvæmt reglugerð sbr. hér 13. gr. þeirrar reglugerðar um almennan rétt hinna fötluðu í þessum efnum svo og rétt þeirra til lána vegna kaupa á nýjum íbúðum skv. 19.—27. gr. ofangreindrar reglugerðar og til kaupa á notuðum íbúðum skv. 28.—33. gr. reglugerðarinnar svo og um rétt hinna fötluðu til lána vegna sérþarfa sinna skv. 47. og 48. gr. reglugerðarinnar. Einnig um það hvernig lán vegna sérþarfa hinna fötluðu geta farið saman með lánum til kaupa á nýjum eða notuðum íbúðum, sbr. 26. og 32. gr. framangreindrar reglugerðar.

Jafnframt skulu svæðisstjórnir kynna sér möguleika hinna fötluðu til að fá lán úr Byggingarsjóði verkamanna skv. IV. kafla laga nr. 60/1984, sbr. lög nr. 54/1986, svo og til að fá leiguíbúð skv. c-lið 33. gr. sömu laga.

Ferlimál.

17. gr.

Svæðisstjórnir skulu fylgjast með því að aðgengi fatlaðra, utan húss sem innan, verði sem best tryggt við byggingu nýrra vinnustaða svo og þjónustustofnana, s. s. samkomuhúsa, sjúkrahúsa, skólahúsa, iðnaðar-, verslunar- og skrifstofuhúsa, sbr. ákvæði 6.10.1.1. byggingarreglugerðar nr. 292/1979 með síðari breytingum. Skal hér sérstaklega gætt ákvæða

byggingarreglugerðar um aðkomu að opinberum byggingum (6.10.1.4.), snyrtiaðstöðu (6.10.1.2.), lyftur (6.10.1.5.) og rými fyrir hjólastóla í hverju samkomuhúsi (6.10.2.6.).

Jafnframt skulu svæðisstjórnir gera tillögur um það hvernig breyta megi eldri vinnustöðum og þjónustustofnunum þannig að tilgangi 1. mgr. þessarar greinar verði sem best náð.

Um aðgengi skal höfð samvinna við Vinnueftirlit ríkisins, byggingarnefndir, ferlinefndir sveitarfélaga og hönnuði.

Endurhæfing. Atvinnuleit.

18. gr.

Svæðisstjórn skal jafnan leggja áherslu á að sem best tengsl séu á milli hæfingar og endurhæfingar annars vegar og atvinnuleitar hins vegar. Lögð verði sem mest áhersla á að fatlaðir, sem notið hafa hæfingar og endurhæfingar, fái vinnu við sitt hæfi þannig að endurhæfingin nýtist þeim.

19. gr.

Á hverju svæði skal koma á atvinnuleit fyrir fatlaða sem hefur það hlutverk að afla fötludum atvinnu við sitt hæfi.

Þar sem vinnumiðlun hlutaðeigandi sveitarfélags starfrækir sérstaka deild fyrir öryrkja samkvæmt lögum um vinnumiðlun nr. 18/1985, skal svæðisstjórn fela þeirri skrifstofu starfrækslu atvinnuleitar, sbr. 1. mgr.

Á öðrum svæðum skulu svæðisstjórnir stuðla að atvinnuleit í nánnum tengslum við félagsmálaráðuneytið, vinnumiðlun hlutaðeigandi sveitarfélags, aðila vinnumarkaðarins og aðra hlutaðeigandi aðila.

Leggja skal áherslu á að skipuleggja hlutastörf eftir því sem við verður komið vegna þeirra sem ekki þola vinnuálag sem fullt starf hefur í för með sér.

Jafnframt skulu svæðisstjórnir, í samvinnu við stjórnendur fyrirtækja og trúnaðarmenn hlutaðeigandi stéttarfélaga, beita sér fyrir fjölgun starfa fyrir fatlaða á vinnustöðum.

Kennsla í heimahúsum.

20. gr.

Hlutaðeigandi svæðisstjórn skal sjá um að fatlaðir, sem samkvæmt lögum um grunnskóla eiga rétt á kennslu en af óviðráðanlegum ástæðum geta ekki sótt skóla og notið kennslu utan heimilis, fái kennslu við sitt hæfi í heimahúsum. Svæðisstjórnir skulu gera tillögur í samræði við hlutaðeigandi aðila, þ. e. a. s. fræðslufirvöld og aðstandendur hins fatlaða um það hvernig fyrirkomulag þessarar þjónustu verði best háttað.

Stuðningsfjölskyldur.

21. gr.

Umsóknir um þjónustu stuðningsfjölskyldu skulu sendar hlutaðeigandi svæðisstjórn sem fjallar um þær í samræmi við reglugerð nr. 345/1985 um stuðningsfjölskyldur vegna fatlaðra.

Fjárhagsaðstoð við fatlaða.

22. gr.

Svæðisstjórn skal sjá um að framfærendur, sem kjósa sjálfir að annast fatlaða í heimahúsum og að mati svæðisstjórnar eru hæfir til þess, fái fjárhagsaðstoð og skal farið með slík mál í samræmi við reglugerð nr. 457/1984.

Jafnframt annast svæðisstjórn eftirlit með þeim er slíkrar aðstoðar njóta, sbr. 7. gr. fyrrnefndrar reglugerðar.

23. gr.

Svæðisstjórnir gera tillögur um fjárhagsaðstoð til fatlaðra í samræmi við 19. gr. laga nr. 41/1983 um málefni fatlaðra, sbr. reglugerð nr. 244/1986 um styrki og lán til verkfæra- og tækjakaupa og reglugerð nr. 265/1985 um styrki og lán til greiðslu námskostnaðar fatlaðra.

Ýmislegt.

24. gr.

Svæðisstjórnir skulu fylgjast með framkvæmd laganna hver á sínu svæði og gera tillögur um úrbætur. Slíkar tillögur skulu sendar hlutaðeigandi ráðuneyti og stjórnarnefnd ásamt rökstuddum áætlunum. Stjórnarnefnd skal fylgjast með því að unnið sé að úrlausn þeirra tillagna er fram koma.

25. gr.

Svæðisstjórnir og stofnanir skv. 7. gr. laga nr. 41/1983 um málefni fatlaðra skulu senda hlutaðeigandi ráðuneyti skýrslu yfir reksturinn fyrir hvert almanaksár. Einnig skulu þær svæðisstjórnir og stofnanir sem ekki eru í bókhaldsþjónustu ríkisbókhalds senda hlutaðeigandi ráðuneyti ársreikning endurskoðaðan af löggiltum endurskoðanda fyrir lok mars ár hvert.

Sundurliðað kostnaðaryfirlit yfir framkvæmdir, sem úthlutað er til úr Framkvæmdasjóði, skal í árslok senda stjórnarnefnd.

26. gr.

Svæðisstjórn annast önnur þau verkefni, sem stjórnarnefnd eða ráðuneyti kunna að fela henni.

27. gr.

Sérhverjum, er starfar samkvæmt reglugerð þessari, ber að gæta fyllstu þagmælsku um það sem hann kemst að í starfi sínu og leynt skal fara samkvæmt lögum eða eðli máls.

III. KAFLI**Starfshættir svæðisstjórna.**

28. gr.

Svæðisstjórn kýs sér formann, varaformann og ritara úr eigin hópi.

29. gr.

Svæðisstjórn kemur saman til fundar svo oft sem þurfa þykir, þó eigi sjaldnar en fjórum sinnum á ári. Skyld er að boða til fundar ef tveir stjórnarmanna óska þess enda sé fundarefni tilgreint.

30. gr.

Fundur svæðisstjórnar telst lögmætur ef allir stjórnarmenn hafa verið boðaðir með að minnsta kosti þriggja daga fyrirvara. Fundur skal boðaður með dagskrá.

31. gr.

Svæðisstjórn afgreiðir mál með ályktunum á fundum. Afl atkvæða ræður úrslitum um afgreiðslu mála. Ályktanir eru því aðeins bindandi að meiri hluti stjórnar sé á fundi.

32. gr.

Fundargerðir svæðisstjórna skulu ritaðar í gerðabók og staðfestar með undirskrift fundarmanna.

33. gr.

Pegar taka skal ákvörðun, er varðar sérstaklega tiltekna stofnanir eða sveitarfélög, skal svæðisstjórn gefa hlutaðeigandi aðilum kost á að kynna sér málið og láta álit sitt í ljós á fundi hennar.

34. gr.

Svæðisstjórn er heimilt að ráða framkvæmdastjóra að fengnu samþykki félagsmálaráðuneytis. Hlutaðeigandi skal hafa þekkingu og/eða reynslu af málefnum fatlaðra. Starfssvið framkvæmdastjóra er m. a. að sjá um daglegan rekstur svæðisstjórna. Jafnframt er svæðisstjórn heimilt að fela framkvæmdastjóra að vinna að rekstrar- og fjárhagsáætlunum svo og önnur störf er svæðisstjórn telur rétt að fela honum. Svæðisstjórn er enn fremur heimilt að ráða aðra starfsmenn í þjónustu sína að fengnu samþykki félagsmálaráðuneytis.

35. gr.

Kostnaður vegna starfa fulltrúa í svæðisstjórn greiðist úr ríkissjóði. Þóknananefnd ákveður laun vegna starfa svæðisstjórna. Um greiðslu ferðakostnaðar gilda sömu reglur og um opinbera starfsmenn.

Annar kostnaður við starfsemi svæðisstjórna greiðist úr ríkissjóði.

Gildistaka.

36. gr.

Reglugerð þessi, sem sett er samkvæmt lögum nr. 41/1983 um málefni fatlaðra, öðlast gildi 1. september 1986.

Félagsmálaráðuneytið, 23. júlí 1986.

Alexander Stefánsson.

Margrét Margeirsdóttir.

5. september 1986

Nr. 394

SAMÞYKKT

**um breytingu á samþykkt um stjórn Akureyrar nr. 143 frá 29. ágúst
1962 sbr. samþykkt nr. 319 frá 20. júní 1986.**

1. gr.

29. tl. 29. gr. orðist svo:

Fimm fulltrúa á Fjórðungsþing Norðlendinga og fimm til vara.

Samþykkt þessi sem bæjarstjórn Akureyrar hefur sett staðfestist hér með samkvæmt 7. gr. sveitarstjórnarlaga nr. 8 18. apríl 1986 til að öðlast gildi þegar í stað.

Félagsmálaráðuneytið, 5. september 1986.

F. h. r.

Hallgrímur Dalberg.

Þórhildur Líndal.